

Ullormut oqaluuserisassanut nassuiaat.

(Inatsisartut Siulittaasoqarfiat)

Immikkoortoq 33, Inuusuttut angerlarsimaffiup avataanut inissinneqarsimasut 19-iniit 23-inut ukioqalersimasut annertusakkamik paarineqarallarsinnaanissaminnut inatsimmik tunngavilikkamik neqeroorfigineqarsinnaanissaasa qulakkeerneqarnissaa siunertaralugu, meeqqanik inuusuttunillu ikiorsiisarneq pillugu Inatsisartut peqqussutaata allanngortinneqarnissaanik, Naalakkersuisut peqquneqarnissaannik Inatsisartut aalajangiiffigisassaattut siunnersuut aamma immikkoortoq 62, Kalaallit Nunaanni meeqqat inuusuttullu angerlarsimaffiup avataanut inissinneqartartut sullinneqarnerisa nakkutigineqarnerat sukateriffineqaqqullugu Naalakkersuisut sulissuteqaqqullugit Inatsisartut aalajangiiffigisassaattut siunnersuut, ulloq 22. oktober 2009-mi ataatsimoortillugit suliarineqartussanngortinneqarput. Immikkoortut ataatsimoortinnagit suliarineqarnissaannik Naalakkersuisut qinnuteqarput. Tamanna akuerineqarpoq.

Immikkoortoq 12-ip, Inatsisartut Ombudsmandiat pillugu Inatsisartut inatsisissaattut siunnersuummut tunngasup kinguartinneqarnissaa qinnutigineqarpoq. Immikkoortup siullermeerneqarnissaa 2009-mi ulloq 23. oktoberimit ulloq 6. novemberimut nuutinneqarpoq.

Immikkoortoq 93-ip, Kulturikkut eriagisassat tigussaangitsut illersorneqarnissaat pillugu UNESCO-mi isumaqatigiissutip 17. oktober 2003-meersup, danskinit atortussanngortinneqarnissaanik Namminersorlutik Oqartussat oqaaseqaatissaannut aalajangiiffigisassatut siunnersuummut tunngasup aappassaneerneqarnissaa ulloq 23. oktoberimi pinnani ataatsimiinnerup ingerlanerani kingusinnerusumut nuunneqarnissaa Kultuqarnermut Ilinniartitaanermullu Ataatsimiititaliap qinnutigaa. Immikkoortup ulloq suliarineqarfissaa kingusinnerusukut aalajangerneqassaaq.

Inatsisartunut ilaasortat Andreas Uldum (D) aammalu Karl Lyberth (S) ullumikkumit atuukkallartussamik taasisarnermut isumaqatigiissuteqarput.